

Bigarren bilera egingo du, gaur, hondakinen kudeaketerako lan taldeak

Gipuzkoako hondakinen kudeaketari buruz ariko dira Imanol Azpiroz eta Carlos Ormazabal

I. Garcia Landa

Tolosako Udalak abian jarri duen hondakinen kudeaketarako lan taldeak bigarren bilera izango du gaur, 19:00etan, udaletxeko areto nagusian.

Bilera horretan bi gonbidatu izango dira: Imanol Azpiroz San Markos Mankomunitateko lehendakariorde ohia eta Carlos Ormazabal aurreko legealdiko Gipuzkoako Garapen Jasangarriko diputatua. Zehazki, Gipuzkoako hondakinen kudeaketaren inguruan ariko dira bi hizlariak solasaldian.

Irudia ◊ Tolosa



MUSIKA KAPERAREN OMENALDIA

Santa Maria musika kaperak omenaldia egin berri die aurreko hiru zuzendariari, Migel Zeberio, Luis Mari Gartzia, eta Ander Letamendia; eta organista ohiari, Pepe Arzellus. Joxe Mari Villanueva egungo lehendakariak azaldu duenez, «orain 30 urte inguru, musika kaperak galtzeko zorian izan zen, eta, besteak beste, omentutako hiru zuzen-

dari ohiari eta organista ohiari esker lortu zen erakundeari eustea». Igandean izan zen omenaldia. Lehenbizi Santa Maria parrokiako mezan abestu zuen musika kaperak. Ondoren, Fronton jatetxean egin zuten ekitaldia. Argazkian, Zeberio, Arzellus, Luis Orduña egungo zuzendaria, Gartzia eta Letamendia. HITZA

→ Laburrak

Jai batzordearen bilera egingo dute gaur

GIZARTEA ▶ Jai batzordeak bilera egingo du, gaur, 19:00etan. Sanjoanak izango da gaia. Alde batetik, 19:00etan Kuadrila Eguna landuko dute; bestetik, 19:30ean, egitaraua eta ekitaldiak landuko dituzte. Bilera Euskal Herria plazako gerontologiko zaharreko gelan egingo dute.

Batxilerrari eta heziketa zikloi buruzko saioa

TOLOSA ▶ Orixe institutuak batxilerrari eta heziketa zikloi buruzko informazio saioa antolatu du biharko, hilaren 26. Gorasabel eraikinean izango da, 19:00etan, eta bertan izango da Alberto Ariño orientatzailea. DBHko laugarren mailakoek datorren ikasturterako aurrematrikula maiatzean eta ekainean egin behar dute, eta horregatik saioa garrantzitsua dela azaldu dute institututik.

Mario Rodriguez Vargas ◊ Greenpeace Espainiako zuzendari exekutiboa

«Kontsumitzeko eredua aldatu behar dugu»

Imanol Garcia Landa

Naturaldia jardunaldien gaurko saioan *El planeta libre* filma emango dute, Topic zentroko aretoan, 19:30ean. Ondoren solasaldia izango da Mario Rodriguez Vargas (Madril, 1965) Greenpeace Espainiako zuzendari exekutiborekin.

Zer harreman duzu *El planeta libre* filmarekin?

Pelikula aitzakia da garapen ereduaz hausnartzeko. Zine forum moduko bat egingo dugu. Pelikulak umore ukitua du, batzuetan bitxia da, eta gizadiak dituen egungo arazoak jorratzen ditu: poluzioa, trafikogehiegikeria, nuklearren gaia... 6000. urtean beste planeta batean bizi den komunitate bat ikusten da pelikulan, eta egungo Lurra planetara joaten da horietako bat, eta une horretan bizi de zentzugabekeria ikusten du.

Zer analisi egiten duzu zuk egungo egoerari buruz?

Egun, planetak eusten ez dion handitze mailan gaude. Europar batek hiru planeta egongo balira bezala kontsumitzen du, eta estatubatuar batek bost egongo bali-

ra bezala. Herrialdeen zor ekologikoa neurtzen duen New Economics Foundation erakunde independenteak orain gutxi esan du Espainiak dagoeneko urte honetako errekurtsio guztiak kontsumitu dituela. Hemendik aurrera, kontsumitzen den guztia beste herrialdeen lepotik izango da, edo defizit ekologikoa sortuko da.

Eta zer egin daiteke egoera horren aurrean?

Greenpeace-tik ikusten dugu eredu aldaketa, batez ere, eredu energetikoaren aldaketatik hasi behar dela. Egun dugun sistema energetikoa guztiz ez-eraginkorra da. Egin ditugun zenbait ikerketen arabera, eraginkortasunez eta teknologia berrien erabileraz, kontsumitzen dugun energiaren %41etik %48ra aurreztu dezakegu, bizi kalitatea jaitzi gabe. Merkatuak eskaintzen dizu hainbat aukera gutxiago kontsumitu ahal izateko. Esaterako, gertuago daukaguna kontsumitzea. Ezin dira laranjak jan urte osoan zehar. Txinatik edo Txiletik ekarri behar dira, eta jakin behar da horrek kostu ekologiko bat duela. Globalizazioak eragin kaltegarri bat du: ez dira ari etekinak edo in-

gurumenaren babesa globalizatzen, baina bai eskubide sozialen galera, edo ingurumenaren babes falta. Hau da, alde txarrak ari dira globalizatzen.

Krisi ekonomikoak eragin dezake egungo garapen ereduaren kritikarik, edo eredu beretik oraindik urrutirago joateko erabili daiteke?

Lanera autobusean jaisten naiz. Lehen ia hutsik joaten zen eta orain beteta doa. Zergatik? Besteak beste, jendeak ez duelako hainbeste garestitu den gasolina ordaintzeko. Orain jasangarritasunaren aldeko jarrera batzuk daude, baina askotan halabeharrez. Nire kezka da krisitik ateratzen garenean, jendea ahaztu egingo dela berriro guzti honetaz. Horrez gain, gobernuak eta finantza sistemak krisiaren aurrean ematen duten irtenbidea da, hau da, gehiago ekoiztu behar dela, gehiago kontsumitu behar dela. Finantza eta ekonomia krisi honen eragin zuzena du krisi ekologikoan. Aldaketa klimatikoaren aurkako borroka guztiz geldituta dago. Krisia bukatzen denean berdin-berdin jarraituko du arazo horrek hor. Orain ez badugu ezer egiten, arazoa handitu egingo da.



GREENPEACE/ADRIAN TYLER

Tony Blair-en ekonomia aholkulariak, Nicholas Stern-ek, esan zuten aldaketa klimatikoaren aurka egitearen kostua munduaren BPGaren %2a zela, baina ezer ez egiteak %20aren kostua ekarriko zuela.

Naturaldia jardunaldietan pertsona eta naturaren aldeko oreka aztertzen ari zarete. Nola ikusten duzu Greenpeace erakundetik gai hori?

Gure erakundeak ingurumenaren babesa du helburu, kontuan hartuta aldagai ekonomikoa eta soziala. Uste dugu azken 20 urteetan aurrerapausoak egin direla ingurumenarekiko sentsibilizazioan. Ingurumerari eraso zuzen bat egiten zaionean, alarma soziala sortzen da. Arazoa egunerokotasunean dago, hau da, gure bizimoduak eta kontsumitzeko ereduak ingurumenean eragin ezkorra dutenean. Izan ere, lehen

esan dudan moduan, apirilera kontsumitu badugu urte guztirako ditugun errekurtsioak, ez dugu harreman orekaturik ingurumenearekin. Aukera dugu hori aldatzeko, bizi kalitatea galdu gabe, baina horretarako gure kontsumitzeko eredua aldatu behar dugu.

Iragarki laburrak

LANA

■ **Zerbitzaria.** Zerbitzari gazte bat behar da, barrako lanak eta mahaiak zerbitzatzeko Ibarrao taberna batean. Asteazkenean zehar arratsaldeetan eta asteburuetan egun osoa egingo da lan. Egun bat jai. 40 orduko kontratua. Telefonoa: 646 186779.